

I FLETËUDHËZUES I PAKETIMIT:
Informacion për përdoruesin

PILOKARPINE

Tretësirë me pika për sy – 20 mg / ml (2%)
(Pilokarpinë klorhidrat)

Lexojeni me kujdes këtë fletëudhëzues përpara se të filloni përdorimin e barit.

- Ruajeni këtë fletëudhëzues. Mund të keni nevojë ta lexoni përsëri.
- Në qoftë se keni pyetje të mëtejshme, pyesni mjekun ose farmacistin tuaj.
- Ky bar është përshkruar për ju. Mos e jepni tek persona të tjerë. Mund t'i dëmtojë ata edhe pse mund të kenë të njëjtat simptoma si ju.
- Në qoftë se ndonjë prej efekteve anësore keqësohet ose në qoftë se vëreni ndonjë efekt tjetër anësor që nuk përmendet në këtë fletëudhëzues, ju lutemi të njoftoni mjekun ose farmacistin tuaj.

Në këtë fletëudhëzues:

- Çfarë është Pilokarpine dhe përse përdoret
- Përpara se të përdorni Pilokarpine
- Si ta përdorni Pilokarpine
- Efekte anësore të mundshme
- Si ta ruani Pilokarpine
- Informacion i mëtejshëm

1. ÇFARË ËSHTË PILOKARPINE DHE PËRSE PËRDORET

Pilokarpina është një alkaloid me origjinë bimore. Në organizmin e njeriut ajo vepron duke nxitur drejtpërdrejt receptorët kolinergjikë të tipit M dhe duke shkaktuar efekte të ngjashme me aktivizimin e sistemit parasimpatik. Këto efekte janë më të shprehura në sy dhe në gjendrat e djersës dhe të pështymës. Pilokarpina gjithashtu është në gjendje të kundërshtojë efektin midriatik të simpatomimetikëve dhe të atropinës. Përdoret për mjekimin e glaukomës së thjeshtë kronike me kënd të hapur dhe të glaukomës akute me kënd të ngushtë. Pilokarpina përdoret e vetme ose e kombinuar me miotikë të tjerë, beta - bllokues, frenues të anhidrazës karbonike, simpatomimetikë ose lëndë hiperosmotike, për të ulur presionin intraokular para ndërhyrjes kirurgjikale dhe për të shkaktuar miozë (ngushtim të bebes së syrit) me qëllim që të kundërshtohen efektet e pikave për sy të lëndëve midriatike dhe cikloplegjike (të dyja shkaktojnë zgjerim të bebes së syrit).

2. PËRPARA SE TË PËRDORNI PILOKARPINE

Mos përdorni Pilokarpine në qoftë se:

- jeni i ndjeshëm (alergjik) ndaj pilokarpinë klorhidratit ose ndaj ndonjërit prej përbërësve të tjerë të Pilokarpine;
- keni patur ndonjëherë shkolitje të retinës;
- keni disa forma të glaukomës sekondare ku nuk indikohet përdorimi;
- keni irit akut;
- keni uveit anterior;
- përdorni lente kontakti të buta, sepse Pilokarpine përmban klorur benzalkoni si lëndë konservuese

dhe lentet duhet të hiqen përpara përdorimit të pikave për sy Pilokarpine.

Tregoni kujdes të veçantë me Pilokarpine

Para fillimit të mjekimit, të gjithë të sëmurët duhet të kryejnë ekzaminimin e fundus okuli, sepse ekziston rreziku për shkolitje të retinës. Pyesni mjekun tuaj përpara se të përdorni Pilokarpine në qoftë se vuani nga: insuficienca kardiake akute, astma bronkiale, ulçera peptike, hipertensioni, hipotensioni, obstrukcioni i traktit urinar, hipertiroidizmi, epilepsia, dhe sëmundja e Parkinsonit. Përdorimi në doza të larta mund të çojë në shfaqjen e reaksioneve sistemike. Gjatë trajtimit, këshillohet të monitorohet presioni intraokular dhe parametrat e funksionit të të parit.

Marrja e barnave të tjera

Trajtimi i njëkohshëm me barna të tjera mund të ndikojë ose të ndikohet nga pilokarpina. Ju lutemi të kontaktoni me mjekun ose farmacistin tuaj në qoftë se jeni duke marrë / përdorur ose keni marrë / përdorur kohët e fundit barna të tjera, përfshirë ato të marra pa recetë. Mos harroni të informoni mjekun tuaj për trajtimin me pilokarpinë në qoftë se ju jepet ndonjë bar tjetër gjatë trajtimit. Është veçanërisht e rëndësishme që, në rastin e përdorimit të pilokarpinës (pika për sy), mjeku juaj të jetë në dijeni të faktit që ju po trajtoheni njëkohësisht me:

- adrenalinë (mund të shkaktojë ulje të mëtejshme të presionit intraokular);
- beta – bllokues (rritë rreziku i aritmive nga pilokarpina);
- timolol (mund të shkaktojë ulje të mëtejshme të presionit intraokular);
- frenues të anhidrazës karbonike (mund të shkaktojë ulje të mëtejshme të presionit intraokular);
- atropinë ose barna me efekte kolinolitike, disa fenotiazina, disa antihistaminikë (antagonizojnë efektet e pilokarpinës);
- barna si: klozapina, disopirami, amitriptilina, amoksapina, bupropioni, etj (bllokojnë ose reduktojnë efektin e pilokarpinës).

Shtatzënia

Kërkoni këshillën e farmacistit ose të mjekut përpara se të përdorni këtë bar. Për shkak të mungesës së të dhënave, është mirë të shmangët përdorimi gjatë shtatzënisë. Në rastet e domosdoshme, kur përfitimi tejkalon riskun, përdorimi duhet të jetë nën mbikqyrjen e mjekut.

Ushqimi me gji

Pilokarpina kalon në qumështin e gjirit. Në këtë rast këshillohuni me mjekun tuaj para përdorimit.

Drejtimi i automjetit dhe përdorimi i makinerive

Pilokarpina mund të ulë aftësinë tuaj për të drejtuar automjetin ose për të përdorur makineri. Mos drejtoni automjetin dhe mos përdorni makineri menjëherë pas aplikimit të Pilokarpine dhe sidomos pa e ditur sesi ndikon ky bar në shikimin tuaj.

Informacion i rëndësishëm për disa nga përbërësit e Pilokarpine

Pilokarpine përmban klorur benzalkoni, i cili mund të shkaktojë iritimi të syve. Shmangni kontaktin me lentet e buta të kontaktit. Hiqini lentet e kontaktit përpara aplikimit të barit dhe prisni të paktën 15 minuta para se t'i rivendosni. Kloruri i benzalkonit çngjyros lentet e buta të kontaktit.

3. SI TA PËRDORNI PILOKARPINE

Gjithmonë përdoreni Pilokarpine sipas këshillës së mjekut. Në qoftë se nuk jeni i sigurt, kontaktoni me mjekun ose farmacistin. Në qoftë se ndjeni që efektet e pilokarpinës janë shumë të forta ose shumë të dobëta, flisni me mjekun ose farmacistin tuaj.

Dozimi:

- për mjekimin e glaukomës kronike dhe shkaktimin e miozës përdoren 1 - 2 pika të tretësirës 2%, 4 herë në ditë;
- për trajtimin e glaukomës akute me kënd të ngushtë fillohet me 1 pikë të tretësirës 2% çdo 10 minuta, përgjatë 1 ore, dhe më pas vazhdohet me 1 - 2 pika çdo 1 - 3 orë, deri në rënien e presionit intraokular.

Mënyra e administrimit të Pilokarpine - pika për sy - 2 % është:

- Lajini mirë duart.
- Mos e prekni vendin e daljes së pikave.
- Shikoni lart.
- Ulni kapakun e poshtëm të syrit për të krijuar një ulluk.
- Vendosni pikatoren sa më afër ullukut, por pa e prekur atë.
- Hidhni sasinë e duhur të pikave në ulluk.
- Mbyllni syrin për rreth 2 minuta.
- Tretësira e tepërt që del mund të hiqet me një garzë sterile.

Në qoftë se keni përdorur më shumë Pilokarpine

Në qoftë se keni përdorur më shumë Pilokarpine se sasia që duhet të përdorni, ose në qoftë se fëmijët e kanë marrë gabimisht këtë bar, ju lutemi të kontaktoni mjekun tuaj, spitalin, ose të telefononi urgjencën për të marrë një mendim për rrezikun dhe këshillë për veprimet që duhet të ndërmerren. Rastet e mbidozimit vërehen në qoftë se Pilokarpine merret gabimisht nga goja. Në këtë rast shenjat janë: djersitje, shikim i turbullt, pështymë e shtuar, të fikët, të përziera, të vjella, diarree, etj.

Në qoftë se harroni të përdorni Pilokarpine

Në qoftë se harroni një dozë (ose më shumë doza), përdorni dozën në vazhdim kur të jetë koha për përdorimin e zakonshëm të saj. Mos përdorni një dozë të dyfishtë (ose më të lartë) për të plotësuar dozën (dozat) e harruar(a). Në qoftë se keni pyetje të mëtejshme mbi përdorimin e këtij produkti, pyesni mjekun ose farmacistin tuaj.

4. EFEKTE ANËSORE TË MUNDSHME

Si të gjitha barnat e tjera, pilokarpina mund të shkaktojë efekte anësore, megjithëse jo çdokush i manifeston. Efektet anësore kryesore janë: djegie, dhimbje, kuarje, kongestion konjunktival vaskular, spazma ciliare, ulje e mprehtësisë së shikimit në kushtet e

ndriçimit të kufizuar, dhimbje koke, shkolitje e retinës dhe hemorragji vitreozë. Efektet anësore sistemike janë të rralla: hipertension, takikardi, spazma bronkiale, të përziera, të vjella, etj. Në qoftë se vëreni efekte anësore që nuk janë të përmendura në këtë fletëudhëzues, ju lutemi të njoftoni mjekun ose farmacistin tuaj.

5. SI TA RUANI PILOKARPINE

Mbajeni larg fëmijëve!
Mos e përdorni Pilokarpine pas datës së skadencës e cila është e shënuar në paketim. Të ruhet në temperaturë 10°C - 25°C!
Ruajeni në paketimin original për ta mbrojtur nga drita!

6. INFORMACION I MËTEJSHËM

Çfarë përmban Pilokarpine – Tretësirë me pika për sy
Lënda vepruese është pilokarpinë klorhidrat.
1 ml tretësirë përmban 20 mg pilokarpinë klorhidrat (2%).
Përbërësit e tjerë janë: klorur natriumi, boraks, acid borik, EDTA dinatriumi, klorur benzalkoni, ujë për injeksion.

Përmbytja e paketimit

Kuti me një flakon plastik steril me pikatore 10 ml.

Shpjegues i ikonave ilustruese për paketim:



Sipas recetës së mjekut.



Përmbytja.



Kujdes.



Pika për sy.

Mbajtësi i autorizimit për tregtim (MAT) dhe prodhuesi:



PROFARMA Sh.a.
Rruga "Myslym Keta"
Tel.: 00 355 4 23 89 602
Tiranë - SHQIPËRI

Ky fletëudhëzues u rishikua për herë të fundit në Shtator 2012.

 SPECIFICATION



CROPING AREA 12 x 19 cm

PAY ATTENTION, all the layers are visible.

If you have to print this document please check or uncheck the specific layers.